

兩浙輶軒續錄

兩浙輶軒續錄卷八目

吳 顯 梁玉繩 王 覲 樊燿碧 李敏芬

陳運庚 王慶元 茹 鎰 湯元裕 黃爲霖

程夔初 范崇模 童起元 張衡青 劉 獻

李 潮 朱大勳 章光祖 仇啟昆 姚繼祖

馮宗城 顧 澗 汪大經 章逢吉 錢 燾

葉聲聞 何 煇 蔡 珍 柯 凱 王家賓

汪世烈 季觀樂 陳培元 陳鳳舉 孫嘉樂

吳 瓊 周勳常 羅 樸 王 璞 章應奎

羅繼章 倪家瑞 范崇治 徐日紀 張 鶴

周駿發 邱 永 查茂蔭 陳 涵 袁 知

王 鑿 潘本素 盧 瀚 周紹洙 韓 義

任 炎 夏復森 衛 琨 來文濬 夏之時

余國鼎 吳廷樂 周道潛 宋鳴軻 何 震

鄭 溥

兩浙輜軒續錄卷八

督學使者潘衍桐訂

吳

顯原名嗣程字仰顯號洛波一號退庵錢塘人乾

吳振域傳略先大父孝友剛毅出于性成行功過格力

斥二氏之說屢上春官不得志得官廣文尋亦棄去家

貧衣食奔走歷閩蜀楚齊魯黔滇蹤跡半天下性尤篤

學誨人無倦色晚年築樓三楹榜曰讀書日與諸孫研

究尋討所著周易纂要家語錄要讀史錄要杭郡詩輯

皆梓行又著書經詩經輯註文選補註格物編論癡叢

殘螯夫碎錄皆未付梓生平節齋

衣食而于振貧濟乏惟恐不及

楊芳燦序略退茶先生游仙三百首星文雲樞織羽

銀泥如訪琴高子赤鯉之溪尋李叟于青羊之肆

緝雅堂詩話往者太鴻先生曾賦游仙詩三百首雅才

高韻世無與抗今吳君退菴復為斯體數亦相埒前賢

有知當畏後生矣如云玉齒何愁堇汁摧年年驢背倒

騎回饒他善算那和璞未見唐虞甲子來長樂鐘聲夢

一部笙簫唱小詞亦似樊榭集中作也

同顧寸田明府游小泉山

玉田有山名小泉泉鳴石罅流涓涓尋幽那惜雙足繭約客

良詩集卷之九
名一
一
上卷
攜酒登山顛石筍玲瓏競奇秀水花鬢沸爭迴漩枕流便倚
苔磴臥烹茗欲借雲腴煎竭來五載住河朔巾車日苦風沙
撲何當眼底見清流爲我半生洗塵濁主人愛客呼醽醑落
日銜山歡不足醉中棖觸舊名心三十男兒還刺促

詠史

長蒲五丈池中生苻氏王粲讖已成歲星一犯淝水敗八公
草木皆爲兵鮮卑驟滅必復國河橋空自勞權翼太歲南行
白虜興短翼仇綏飛不得飢鷹高颺會風塵慕容舊有樗蒲
神可憐涼馬臺邊水暗度魚羊食盡人

青城羶笠知紅羊四京棄盡還棄揚牡蠣灘頭橫一艇金鼈
海舶走君王忠有伯紀姦元長二人用舍關興亾千秋遺恨
陳東疏不是天心亂靖康何事光堯嗣昏德又誅忠諫信汪

黃

滇南書感

涉歷黔滇一歲中
半年苦雨半年風
黃柑是處憐金玉
白馬何人辨異同
痛把身名懲裂瓦
熟聞天道比張弓
五華解識春光好
只負西湖舊織篋

讀唐書本紀偶成

灞澆兵回鼓譟聞
白華殿裏見秦君
孤忠誰識岐靈岳
死義空憐石演芬
洋水數奔猶庇佞
渭東移節早還軍
千秋鄙暗留公論
園竹空教斬綠雲

龍武新軍競鼓鼙
前車不鑿佛堂梨
宮花已笑銜山鹿
行館何堪刻樹雞
瓜摘黃臺空蔓泣
月明西內夜烏啼
射生小豎乘時起
禍水由來怨豔妻

藍菊 并引

藍菊疑卽七月菊譜所謂花色如茄者北人稱江西藍不知何以名江西也玉田縣署有隙地雜蒔秋色而此花之盛凡十數種皆譜所未詳者歌以誌之

昔余讀書寶坻之城南曾見菊花七月開僧庵紅紅白白色
兩三土人告我謂是江西藍今依玉田幕蒔花娛清酣秋光
初動發嫩蕊檀心麗質幽香含晨興過菊圃新花隨意數一
枝退紅開數朵深青吐籬邊藕色倚秋風石畔桃夭媚秋雨
嬌黃豔紫各爭妍拒霜高節憑誰許嗟哉秋園花錦樹老更
嫵鳳仙女兒姿雞冠亦雄武豈如此花得稱菊本根不與眾
卉伍霜前偶作入時妝傅粉施朱渾漫與柴桑徵士雖見遺
應有騷人比蘭杜從今不復羨黃花衍作歌行添菊譜

阿育王山觀舍利塔 并引

寺門古松可數畝倒枝復上皆成合抱而人不知賞也舍利一料石珠耳山僧詭託謂望見紅黃色者有福黑者有禍愚俗惑之不知爲銅鐘所映耳故詩以辨之

育王山寺明州東舊闍佛塔湧出太康中八萬四千役使鬼神力分置震旦標禪宗流傳閱世幾千載我來問古尋靈蹤捧觀塔象高及尺非鐵非石方而空邊爲櫺櫺可仰觀內有舍利懸小鐘色白黯黃大若豆

如黃豆大而圓長色潤白而黯者必其本色黃或鐘所映也

證之眾日將毋同乃知人言皆妄耳事經親覩消塵蒙瞿曇萬相總歸幻牟尼詭託欺昏嘗神山毓秀自有在奇氣蟠結成虬松五枝倒掩下及地屈曲天矯盤髯龍臥生數丈忽

斗起攫拏作勢摩蒼穹驚看不辨枝與幹兀突怪狀留心胸
 歸塗摹想神恍惚昔所未見今初逢田盤松勝非不古以彼
 較此真平庸前人爭詫舍利塔茲松過眼如癡聾我譽奇松
 嗤朽骨長歌論定猶云公法身不壞終何用臭穢之餘溷乃
 翁他年合遇風魔客拋向東洋一笑哄

用王應乾
記中語

梁玉繩

字曜北號諫庵同書嗣子
錢塘增貢著蛻橐八卷

杭郡詩續輯諫庵清門高蔭日事溫警不襍他嗜所著
 史記志疑三十六卷年未四十一已刊行又元號略四卷
 人表攷九卷誌銘廣例二卷呂子校補二卷警記七卷
 蛻橐四卷總名清白士集年七十六沒之先有二絕句
 云性耽古籍閉柴衡硯北低頭過一生數十卷書心力
 瘁妍媸留與後人評回首年華風轉蓬兩親逝後夢難
 通合朝尋到樓神處可在真
 靈位業中若預知終期者
 緝雅堂詩話曜北熟于乙部之學所撰史記志疑漢書
 人表攷詳審雅博廣州書局近已重雕曜北海內清門
 不志富貴與弟處素攷索羣籍著書甚
 多子學昌有庭立紀聞四卷能世其學

借處素弟風篁嶺聽泉

山深暑氣消竹密斜暉靜登覽開襟顏翠葆蔭秀嶺風來碎
琅玕一葉生百影中有玉漿泉吐穴聲清永倚巖默相對心
與水俱冷

鷓鴣米歌

漁洋山人居易錄云弋陽汪少宰偉赴一中官請設
飯止半盂而香滑異常米問所從出云四川以歲例
進

上者其米生于鷓鴣尾尾止二粒取出放去來年則更取之
其事甚異

鷓鴣鷓鴣吾問爾爾何不學雄雞自斷尾胡爲苦喚行不得
猶護尾中二粒米鷓鴣向我鳴鉤輒請對以臆知是不白鷺

縵青鳳裘鶴筆翠翎雄雉頭徵取羽毛助文采山林搜捕遭
危殆可憐更有觸網羅燔炙煎烹調鼎鼐豈若米自尾中生
不勞播穀頻催耕各以兩粒充

玉食香淨突過長腰稅但使年年來去無羈縛予尾脩脩予
亦樂

鐵畫歌

蕪湖鐵工湯鵬字天池居與蕭尺木鄰數往觀畫蕭
呵之湯曰子謂我不能耶遂發憤以鐵寫生鑪錘精
妙古所未有

五金之中鐵最頑化頑竟以鐵畫傳良工憤變畫師習捐棄
膠鉛鎔鐵汁陽鑪熾炭騰紅光十日五日神鎚揚草蟲花鳥
躍冶出詎等鬪鑿聲鏗鏘淬成文向堂中挂水墨丹青壁徒

疥鐵門限破求請煩從教壓倒蕭郎畫昔聞治子學爲裘學
裘以外非所謀又聞好鍛坐柳下幾曾兼說工圖寫今觀此
事古未有兩藝偏能合一手試問錢唐鍛銀戴畫師何如燕
湖鐵畫湯天池

王

覲

字五玉海甯諸生箸百花詩五玉詩鈔齊齋詩鈔

吳振械曰五玉工筆策大字且通印人法詩多新思喜
爲迴文拆字離合顛倒諸體有春游吟一篇每句以四

書人名牽綴其間細意
駿貼頗無對錢述也

錢清漣曰五玉百花詠筆
法秀勁端凝饒有大令風

春草

鬱鬱復芊芊芳隄翠帶連宿煙胡蝶路新雨杜鵑天送客情
千里懷人夢一年平原歸去晚詩思滿吟鞭

三女堆

松風謾謾冷煙霄古冢深藏粉黛嬌
燕子話南朝

蛾眉千古幻花魂葬近花宮得慧根
白鶴弔黃昏

樊燿碧字重軒
餘杭人

秋草

碾徧香車葉正稀王孫惆悵幾時歸
樊川綠漸非一帶尙黏秋士屐幾分空染少年衣
西園路胡蝶雙雙只解飛

闌風仗雨劫繁華榮悴渾同翦綵花
冢上漢琵琶珠簾十里餘殘照碧岸千尋襯落霞
兄弟句新詩吟徧已家家

李敏芬 字維馨一字復齋號漁邨

陳古銘曰漁邨舊居澗水嗣奉母徙新陸百歲坊顏其室曰澗邨凡百餘家皆同姓泥垣竹笆春時桃李晚秋菱菰宛然桃源風景君愛其清幽築別室課田于此故自號漁邨

邨云

鈕膺若曰先生讀書稽古教子義方田一頃視歲之所入除稅與贍給外悉以易書而手自寫本凡三丈許書法不苟生平慎著述不以文自炫

偶然作

空山白雲起冉冉覆巖岫吐吞何透迤深林護晴晝客欲從之遊清風滿衣袖

陳運庚 字雪田烏程諸生箸南行詩草

題故人李雲巖入關圖卷 李名成璠廣西桂林人乾隆己卯舉人浙江遂安令以事

成伊犁旋放歸

人生快意那有此頭白相逢少年子玉關萬里乍歸來把酒
酌君爲君起雪山峩峩高莫比玉龍飛光射眼底鬢髮一聲
馬干羣疾風吹墮寒空裏絕塞貂裘六月單君行乃作畫圖
看曠朗之山山花丹星宿之海星光寒漢使窮搜所未到奇
麗一一隨征鞍筆箋墨染恨未盡十年草檄

君恩寬輪臺今許歸鄉國重向蓬廬恣偃息無情塞草白連
天七十顛毛染更黑轉憶風雪滿天山此行自古稱奇絕特
借丹青作卧遊殊方風景略堪識思君意氣昔稱雄春明同
上蓬萊宮廿載冰霜苦離別詞場跳盪疇與同豈意玉門得
生入淋漓老筆窮能工草堂夜半見此畫但覺漠漠生長風

王慶元 字小竹
鄞諸生

重游錢湖姜大雪篁索詩題壁

中流一幅畫圖開，小巧舟行日幾回。
嶼外亂飛霞影去，波心清送月光來。
鉤輈鳥語林閒渡，欸乃漁謳港口催。
容我布帆留十日，此身翻厭住樓臺。

茹

鏜

字愷廷山陰廩貢官蘭谿訓導

金華詩錄書後

浙東古郡稱東陽，谿流紆折通錢江。
山高五洩連宛委，我家卻在稽山旁。
兩郡繡壤本相錯，婺州文獻心所降。
況今太守古循吏，陶化重見江夏黃。
采風八邑徧遐邇，藻耀厯落歸縹緲。
細鼓吹盡奏承平樂，珊瑚未許滄海藏。
樊桐山人紫陽胄，祖德傳述能芬芳。
相與商榷振風雅，諸生絡繹趨門牆。
東南之美好賓主，詩壇卓卓開堂皇。
大書深刻垂世宙，學術治行皆參詳。
偏長小技授之徧，不惟韻語冠詞場。
憶昔吾鄉董廣文

吳甯秉鐸來此邦曾從厯朝錄箸述一邑遺編能闡揚今于
司訓到澱水奉令掾采盛巾箱幸得書名託卷尾亦忝附驥
霄餘光近聞越州事編輯傾筐倒篋多琳瑯慚余游宦未得
與江流淼淼思茫茫

湯元裕

字清泉蕭山人
箸蒙養山房集

五兒金釧視學楚南志喜兼以勉之

官清不憂貧任重防覆餗悠哉父母心念子常置腹吾兒入
詞垣十載霑微祿勤儉守家風立腳不隨俗盤飧無兼味晚
食以當肉道遠出無車讀書月代燭雖有家貧累我心亦知
足今也荷

帝簡申命視楚學人情處此閒豐腴恣所欲不知幽獨中咫尺
懷嚴肅作事偶欺心與人便怨讟耳目或不周匪人肆其

毒我聞古人言福兮禍所伏所以勉吾兒謹慎宜加勸公平
得士心寬厚待僮僕進思求才賢勿忘

君恩渥退食誦清芬我祖言維服夙夜罔或懈温和如集木
戰戰復兢兢所生毋忝辱

黃為霖

字益庵臨海諸生著傳
經樓詩鈔瑞竹詩錄

黃瑞曰曾叔祖嗜學不倦研性理諸書旁及子史百家
靡不淹貫學使阮公試台州奇其文拔置冠軍館於庠
宋弼山明府為刻入三台文鈔中兼善
書法結構嚴整其得意處酷似顏魯公

桐柏山謁清聖祠

清聖祠堂在閒行到碧岑九天僕射位片石首陽心簪笏諸
峰拱風霜古柏森到今猶俎豆山水見高深

程夔初

字嗣音號習庵永康
恩貢著西軒前後集

縣志夔初於書無所不讀為文簡老兀傲如古松怪石
苔蘚斑駁絕非耳目近玩好讀史集左氏公穀國語國

策訂為一編名五家古文
又著國策集注若干卷

表徐長史學顏

學顏字君復三登順天副榜崇禎甲戌以副榜推恩

改貢准廷試己卯拜楚府長史補兵備使者兼知江

夏縣事張顯忠寇湖廣戕楚王又圍武昌遭賊奔內

應城陷學顏與賊格鬪賊斷其右臂左手尙持刀不

仆罵賊益厲遂被支解闔室殉難者二十餘人

妖鳥漫天飛啄食及龍種屠戮百萬人楚江流血湧先生佐

大藩見義毛髮竦殺賊肢體分斷臂有餘勇一死壯山河感

事神若悚

范崇模

字法周號琢
堂西安廩生

廖金城傳畧琢堂性孝友恂恂儒雅無他嗜好惟以文
史自娛阮芸臺學使校士衢郡奇其文疑為老宿及覆

試乃弱冠少年益器之以
優行客部由是文譽日隆

澱甯寺秋眺

澱水沄沄浪不驚
梵王宮殿暮煙橫
帆飛極浦流雲影
葉脫空林作雨聲
別院疎鐘花外應
半輪寒月佛前明
逢僧靜叩禪關妙銷盡塵心百慮輕

童起元

字承乾號蓮史江山廩生

須江詩譜蓮史天姿穎異幼有神童之目博極羣書文筆雅健常屈其座人學使汪公憲庵亟賞之

遊仙巖寺和徐太史謙題壁元韻

古寺隱巖腹開山無歲年
蓮花參寶相柏葉煮寒泉
願證上方佛閒從入定
禪斜陽歸路晚回首但蒼煙

張衡青

字仲平號湘九永嘉人

朱壽保曰衡青秦青仲弟為名花十友之一詩多社中唱和之作

落花

酒人初散小園空
纔見新紅又落紅
春事飄零成隔世
笛聲淒咽在東風
迷迷畫院幽苔路
寂寂琴簾落照中
爲爾年年攬懷抱
可堪腸斷賦驚鴻

劉

獻

字雄才龍泉歲貢

縣志獻博覽經史壽至九十餘乾隆間恭迎

聖駕蒙

御賜

綵杖

花石灘

昂山千仞勢鬱蟠
桑溪百尺湧驚湍
清波見底曠不乾
歷歷砂中碧與丹
爛如珠璣堆玉盤
故老云是花石灘
昔時舟楫泛晴瀾
夜月漁翁垂釣竿
南去劍湖七井寒
歐冶古廟芬椒蘭
孕奇蓄秀瑞氣攢
宏才傑筆紛琅玕
科名赫奕巍衣冠
誰

人截流築石關夕陽無復帆影盤但聞細浪聲珊珊山川寂寞坐長歎何時澄泓復舊觀巨靈妙手展非難功與金鰲並不刊

李

潮字沛斯海甯人乾隆庚辰舉人著晚秋遺稿

杭郡詩三輯沛斯少孤力學事寡母以孝聞

舟次苕溪

澤國程何遠扁舟坐欲忘未游松竹里纔過水雲鄉塔影來

天末鐘聲起夕陽吳興風景古泊岸問蠶桑

朱大勳

字巽峯號南棧海鹽人乾隆庚辰舉人官壽昌教諭

校官詩錄南棧少孤母教成立

純廟

南巡以請生獻賦受賞撫軍永公聘脩

幸浙

盛典在壽昌盡心啟迪頌播士林薦用知縣貧病卒於

都沈文恪公詩云童子亦知朱孝子春風傳徧小蘭亭蓋病亟時痛不能事母也小蘭亭在壽昌

辛巳計偕途中與陸朗仙同行比南歸朗仙有詩贈別

次韻

水郭山邨柳色新悠悠車騎逐征塵將尋日下看花侶忽遇
雲閒入洛人攬轡澄清心共許對牀風雨夜相親那堪康了
空歸去席帽疲驢易水濱

章光祖

字接三歸安人乾隆庚辰舉人自
湖北應城知縣著硯安齋詩鈔

耐冷譚接三與樗庵僧友善其吟草
並經樗庵選定身後無嗣詩多散失

村居雜賦

守分貧殊樂忘機趣自長病愁當酒怯懶覺和詩忙果熟添

猿食廚空乏鼠糧北窗清嘯發無事傲羲皇

仇啟昆

字貞肇號樸童鄞人乾隆庚辰舉
人官籍雲教諭著曰武軒詩草

遊白雲洞

行行好溪南興到成獨往選勝踏層雲指點一峯上玲瓏穿
仄徑雲厂計餘丈鉤衣石稜稜深處憩游杖山門午食初法
筵繪幽象揖客老衲閒似說菩提長花木淨禪心世界歸清
賞冷署八載餘斯游覺蕭爽坐久西風寒欲住悄然想回首
暮鐘聞數聲雲外響

姚繼祖

字字清會稽人乾隆庚辰舉人官貴州銅仁知府著還雲堂詩集三卷

校官詩錄先生爲少保熙止公孫霸昌道息園公季子世以功名顯家聲克紹詩亦有慷慨激昂之致

示子

昔予失怙時年甫十一齡恂恂思笑語夢寐常涕零時豈有
師傅慈訓實典型夜窗侍紡績相對鐙青熒衣食傾母匱飢
寒號父靈百貨不得一孑然無周親頗憶似汝年腹餒衣懸
鶉子命不如汝汝年已成丁士風雖樸素不使汝憂貧家學

雖淺薄不使汝荒經及子年未老努力在茲辰要語更申勸
小子當書紳血氣正未定三戒首聰聽宅心務存厚接物宜
率真予祖暨予父功德鐘鼎銘君子澤未艾後起當有人栽
培與傾覆人定天則因斧斤勿自伐萌蘖成輪囷嗟予竊微
祿繩武志未伸所期在遠大非徒荷析薪

若邪夜歸

射的亦不元斗米已四百樵風非不便薪桂誰復積念自我
生後物價三倍昔世風趨華靡中乾外彌澤玉粒罄蓋藏勞
力培菽麥今年入冬旱惟見曉霜白殷憂託微吟坐任柔櫟
兀未覺歸路遙城頭上明月

懷人四首 錄二

有誰彈鋏卻憐馮

用鷺市舊句

我歸君去燕與鴻弱女許嫁乏荆

布家貧不愧儒素風前年奔走榆關外近聞轉徙官渡東久
客不敢作歸夢歸來反不如客中吁嗟予懷兮懷鷺市白髮
無情將老矣

馮國泰
字鷺市

登堂拜母觴再進設饌先知巨卿信萬里省親走南粵想見
斑衣侍霜鬢知君獨免內顧憂有子岐嶷婦柔順叔度汪汪
千頃波使予不見生鄙吝吁嗟予懷兮懷西霞安得促坐觴

蓮花

王增字
西霞

詠白頭翁

鶴頂丹砂燕紫頰纖禽何事獨皤然嗟予幾日能青鬢憐爾
一生無少年花下微吟春欲暮林閒投老骨難仙吾生有限
終如此爲憶莊周齊物篇

馮宗城

字子維嘉善人乾隆庚
辰副貢官湯溪教諭

贈孝子祝景行 并引

余秉鐸仙舟知有農家孝子陶承淵廬墓三載特訪
焉今年諸生復有來告者曰祝氏孝子景行母死守
墓已閱一載余異之親造其墓見其人年五十餘形
容毀瘠撫墓淒然念湯邑荒僻至性過人於目不知
書之輩得兩人焉噫此實難矣援筆以贈

純孝在村農百行斯爲首學校樹風聲倫紀乃職守懿德徵
陶君流俗已罕有繼聞東祝里追蹤得其偶何怙失所天竭
情悲亾母棲廬依墓側星燧一周久哀慟驚猿鳥淒清感童
叟瞻望實傾心公餘訪隴畝樸誠非好名麻衣面蒙垢三年
尙勉旃孺慕報恩厚宅里待
表旌堪式同袍友

顧瀾字葛民海甯諸生

杭郡詩三輯葛民為曹桐石徵君高足弟子徵君輯峽川詩鈔葛民實與蒐校之役家多藏書惜俱散佚并詩稿亦無存者

旱甚冒暑至當湖開橫橋堰詩以紀之

晴空萬里無纖雲秋陽烈烈酷如焚稻方抽穗河且涸呼天

野老憂心薰憶昔乙巳遭旱荒兩月不雨愁恆陽我鄉名宿

顛大吏當湖橫橋過隄防兔牀先生請於撫軍檄縣開闢億萬頃田並霑漑

王公碑記言綦詳平湖令王公撰記載縣志卽今何不循成例當事亦喜

紆憂悸古來神禹奏平成疏濬決排無別計曾不崇朝功已

休挽瀉銀河水暢流行看溝塍徧滋灌旣槁禾且蘇田疇新

穎繁穗垂千百倉箱整頓乘時收從茲安瀾快利導太史年

年書有秋

汪大經

字書年號秋白嘉興貢生著借秋山居詩鈔

蒲禡山房詩話秋白籍居秀水為贅茸城生平往來吳越間兩幔風牆筆牀茶竈所至輒訪其名勝及與朝人

俊士交能書善散體文又從沈沃田學詩清新峻拔繩尺自然羣謂裴村樓之後勁也

胡昌基曰西村倚居湖上幾四十年其羣從兄弟多仕顯而西村落然無侶壯歲歷游齊魯燕趙豫開復歸

湖上以賣字為活所與游多一時名士其詩縱橫自騁夷與曠遠不名一長所輯有江湖故人集樹味集及詞

選雅諸

紫雲洞

曉起斷檐溜微陽漏耿耿因逐樵人蹤來過湖西嶺曲磴羸
殼旋仄徑龜背互人從樹杪上百折乃至頂豁訝闢古洞吞
吐溼雲影崖傾光難留壁立勢何猛局脊類入甕坎窞比坐
井山深古木寒澗細流泉靜欲學阮公嘯恐驚螿龍醒簌簌
陰風生逼我毛髮冷拾級梯而登出險衣迺整疎林聞磬聲

吟策思更騁

談箋三十韻

國書重白麻法審尙白練古人用各宜貴素弗貴絢有明談
仲和製箋其稱善乃祖侍郎公入直邀主眷內府多祕藏攜
歸自別殿當時祕不洩遺法授後彥仲和其從孫斯技妙獨
擅選材萬竹良麤密百番揀拓背膏細勻側理漿暗濺疊以
雲舒舒研之雪片片鋪槽淡日烘縣桁嫩風扇薄洒金熨帖
淺搨花隱見稍煩黃蠟揩畧經碧硯鍊層層淨玉膚溶溶澄
鏡面旣殊剡川藤亦勝鵝溪絹其妙在本色無取朱粉碾愛
茲質瑩潤恰稱筆老健捆載致遠可束裝攜餽便攸往占易
卦利幾中夏徧豈止充藝林亦且備宸院如何法失傳紛紛
造都贗誇奇貨競居增華價反賤譬彼噉名客實去名尙戀

吾也生已晚真者未獲見考古識遺製乃知今製變年來寓
茸城生計惟筆硯手曾十樣披目慣五色炫草草供塗抹何
暇致深辨蠅頭苦細書埋首日常晏打門者誰子又聞索題
卷

靈巖山

朝曦射初桃影落峯際塔舍輿步仄徑粒粒露珠踏寺門面
湖開湖光互歎欲想見烟暝時溼翠萬頃納琴臺渺何處導
我來破衲躡屐躋其巔拂袖松風颯雲外一聲鐘響聽四山
答

楊吳大安寺鐵香爐歌

楊吳太和僞改元閉門天子乃稱尊江山半角侈雄據專事
福利崇沙門洪爐鑄供大安寺風輪鼓橐雷車奔蓮萼作頂

葉作蓋如峯突兀暹朝瞰重萬二千高仞五工監特誌內監
孫聚六州鐵鑄此錯緣化下括村夫村霸圖誕冀佛力護詎
識煬竈先徐溫虛堂博山熒暗燄秘謀籌畫灰無痕彼火則
活此火死哀哉旋泣釜底魂有其舉之莫或廢代更物換爐
猶存摩挲每邀過客訪銷歇無復沈檀歎吾鄉竹垞稱博古
銘文惜未全討論茲看頑鈍混香色苔蘚剝蝕蒼烟昏汴京
香井此豈類出門一笑吟髯掀

述庵先生取宋漫堂中丞廬山僧寺所藏小像重摹供
于北蘭寺懸津詩屋偕同人往祀之祀畢小飲卽用
中丞韻

前賢棲止處爾室亦如蘭選勝留初地流光等急湍庭空花
破寂林密鳥投安不盡臨風感遐心託翠巒

及茲春未去撰杖侍雲亭釀酒杯浮白鑄詩竹削青舉頭延
素月僂指賦晨星時述庵先生已有遷少司寇之信大雅思誰繼箏琶本倦

聽

古華又以桃核石索題石爲阮湘圃封公所貽

竊而食之方朔桃桃核紛向雲中拋鏗然墮地化爲石淮上
仙翁初拾得傳觀一座人咸驚無人識是衡星精小石果嵐
良取義石不能言以形示磊落中含玉液温仙翁寶更逾瑤
琨何時瑩然入君手好向西池奉阿母君先繪有丹荔圖合
成雙璧圖不孤只恐驪龍夜破夢錯認遺珠爪搜弄題箋我
亦思好春桃葉桃根半化塵幻想此核種儻活勞君呪以生
花筆

曉雨坐雲林方丈

一夜不成寐上方鐘又聞氣蒸叢薄雨寒壓亂山雲曉色侵
眉冷秋聲到耳分何妨學彌勒禪飲坐微醺

章逢吉

字孟皆號滿莊歸安諸生著春
樹樓詩草二卷懷叟集一卷

家傳略孟皆性沈默尚孝友狷介不苟取兄弟三人次
林藻林春俱循謹勵行一門之內雍雍穆穆鄉里式焉

閩中秋前一夕對月

青天無纖雲夜色涼如水回首望鄉關光景定復爾高堂白
髮人仰見色應喜瑩瑩白玉盤笑爲孫雛指還復思悄然天
涯有游子坐久恐寒侵予季宜請止

中秋送六舟上人退院

孤雲野鶴一身便偶向茗南結靜緣半頃溪田尋古壠百年
石塔出荒煙師來脩退巖
和尚骨塔禪心自賞周秦物好金
石秋水將登

書畫船

工書
畫

參透木樨歸去好中天明月正團團

錢

熹

字紹開長興諸生著我邨吟藁

縣志熹性至孝父病熹不寢不食病解乃已時猶總角也年十二父母相繼歿哀毀骨立臨窆有烏飛鳴繞其墓咸謂孝感所致

秋日泛罨畫溪

最愛西溪路風輕好放舟孤村紅葉晚二若白雲秋閣影凌波動鐘聲出寺幽仲文遺址盡空見數峯留

集游清涼寺以心清聞妙香為題分得妙字

風從何處來月向懷中照心得一以清香惟眾而妙烟烟自徘徊漠漠相感召消息已全通拈花或微笑

葉聲聞

字鏡炎號艾庵慈谿諸生侯選訓導箸艾庵詩草守瓶齋詩稿

朱文治曰艾庵兄弟六人皆能詩與余相善而於艾庵心契獨深所為詩詞旨雅飭風韻自然非靡豪所能及丹徒戴蕓浦極稱之

長谿嶺

鳥道羊腸素未經長谿遙望意先驚路從箐莽叢中出人在
松杉頂上行一水奔騰誰設險萬山羅列總無名嶺頭幸有
孤亭憩快挹天風兩袖輕

大雪和東坡北臺詩韻

廣莫風號撼臥鴉昨宵聲息隱雷車灑來天上菩提水散作
人閒般若花昏旦無時長卜晝乾坤如水盡浮家縣區浹壤
同歡慶獻賦於今憶李义

何

焯

字千子山陰人官至河南

呂善報曰公余祖姑之子也本名焯占湖南靖州籍補
諸生旋棄去改今名以善治河受知

高廟由府佐游升河南巡撫加兵部尚書銜晉總督卒
贈太子太保
賜諡恭
惠

詠雪

能改遠山色還添枯樹花鋪平高與下處處總清華

蔡

珍

字華谷諸暨歲貢

秋日雜興

高天雲淨碧無垠照眼風光不染塵雁帶斜陽秋色老鷗翻
遠水浪花新相逢按劍誰知己如此飄蓬總愧人入夜樓頭
更蕭瑟可堪礎杵度溪濱

柯

凱

字南軒黃巖廩生
嘗映筠樓詩草

周省山曰南軒天才敏捷下筆千言與予同受知於錢
文敏公性狷介課徒自給門下稱盛陶如淵汪嗣柏宰
景位其最著者

過寶林禪院

古剎森森松竹隈鐘聲隱約出關來猿從佛屋眠初穩鳥傍

禪門飛自迴流水有情穿石出寒花無賴笑人開尋僧方欲
低徊看爭奈蕭條暮景催

白雲庵

寂歷諸天合神風柏子馨野禽朝入屋山鬼夜窺櫺月向前
溪白煙從別島青上方鐘磬徹喚夢問誰醒

王家賓

字心一
東陽人

金華詩錄心一好古力學根柢六經所著記論各體
見者以為劉原父李秦伯一流多病自號十疴癘人

述志寄樓平江

大道久淪沒斯人誰仔肩科舉自聲價記誦為俊賢吾儒欲
深造實惟自得先日計雖不足月計有餘焉古昔子輿氏尊
聖心獨專楊墨為摧折蘇張亦棄捐縱歷秦火劫一綫實未
然唐有昌黎韓觥排障百川五原出心契儒佛畫天淵越宋

濂溪子超悟更無前太極發性理通書至蘊宣私淑程張朱
統緒於斯繇疇爲導先路而乃中不偏矧際昌明後道學如
斗躔婺州四先生考亭一派傳淵源深可溯詎必親几筵趨
向果端正崎嶇可舍旃側足厯危磴期登泰華顛脩詞以立
誠要在根本堅經籍羅胸中有如日在天百家佐討論子史
從貫穿雖多奚以爲得一乃逢原吾兄秉靈姿才藻如青蓮
萬言可倚馬斗酒成百篇所貴斂鋒鏑於以資磨研賤子性
最魯且多俗慮牽逡巡索蠹簡那得先著鞭自笑井底蛙驥
尾敢攀連活潑天機到飛躍在魚鷺明者見自遠定不落言

詮

汪世烈

字伊美號古愚清安貢
生著探梅草廬詩存

家傳略古愚孝友忠義遐邇重之晚年與同
里耆英結詩社佳日清尊人比之香山九老

晚眺

落日認村墟村夫與自如雲低春樹小風淡落花疎暝色空
歸鳥清溪罷釣魚杖藜不覺晚新月映庭除

季觀樂

字碧山永嘉人
著圖餘小草

縣志觀樂初名鎮海家酷貧賣菜為業年二十餘聞有
吟誦聲輒神往而未嘗識字也耆儒某憐其志時為講
解久之通曉學為詩歌古今體俱有法
度素豪於飲竟病酒卒華文漪為之傳
朱壽保曰碧山同時永嘉有七布衣皆能詩設社聯吟
碧山居其一詩尤矯矯孟錦城東甌軼事隨筆稱其陋
窮不憫諷誦弗
輟有古逸士風

秋夜作

雲峯猶賸夏露氣已生秋薄暑消微雨新涼動故愁予懷成
渺渺離思寄悠悠俯仰終無極星河徹夜浮
默坐思無益高歌興浩然秋風起衰草寒露咽危蟬清響趨

羣動殘缸照獨眠平生負豪氣奄忽又經年

陳培元

字我栽龍泉恩貢

留棧閣

傑閣飛蕙駕碧汀荷風拂拂入檐馨倒垂虹影凌雲漢高矗
龍文摘斗星秋水半江雙鷺白晴烟萬里一峯青振興好藉
為霖手請續東坡舊典型

陳鳳舉

字翼九錢塘人乾隆辛巳進士官陝西寶雞知縣改金華教授

塘棲夜泛

秋水澄空碧篷牕枕簟清風輕吹浪縵月出逐舟明乍喜聞
鄉語遲歸動客情幾年垂白意雲樹夢魂縈

孫嘉樂

字令儀號春巖仁和人乾隆辛巳進士官至四川按察使

喜施二樵太守自塞外歸

韓子貧堪賀班生老竟歸一樽京國酒十載塞塵衣赴

闕承

恩重入關同伴稀遼陽丁令鶴今喜故園飛

吳

瓊

初名襄字文溪桐鄉人乾隆辛巳中正榜官內閣侍讀著刻鵝集

縣志瓊賦性誠篤事母盡孝瀏覽經史善屬文尤工於詩酷慕昌黎無勦馘之習辛巳登中正榜授內閣中書擢侍讀家素貧在官尤以清慎自矢大學生劉文正公統動極器重之

社日對雪題蘆雁

昨夜寒雲結蒼葍曉看雪片大於掌紫燕春寒伏不飛杏花
斜倚冰簾朗平生愛雪勝瓊貝况復披圖發奇賞作者丹青
妙入神高堂秋氣來肅爽就中勝地凌瀟湘只少估舶懸五
兩風捲蘆花作雪飛雁奴縹渺煙波廣我昔射策循滹沱仰
天雁陳方北向朝發朱陵夕金微作賓吳楚勞夢想西風鍛

羽倏南飛斷行零落投浩漭唳月嘹風意慘悽鳧翁作伴棲
菰蔣江南十月稻梁肥飲啄無心獨來往風急蕭蕭敗葦鳴
霜清拍拍圓沙響雄飛雌伏復何常夜半孤鳴增慨慷漸盤
衍吉是何年目視燕雀枋榆搶敲冰題罷長吁嗟疎簾旭影
瞳矐上

晚步東臯

雨歇東臯暝村居事事閒詩情牛背笛畫稿夕陽山石筍鋤
雲種松苗帶露刪嶺頭新月上一點破煙鬟

周勳常

字蘭江海甯諸生
善種松莊偶存

海昌詩淑蘭江先生詠
物詩突過元人謝宗可

管庭芬曰蘭江先生性謹訥寡言笑嘗授徒淳溪旅館
篝燈勤事纂輯晤對時惟以故鄉逸事爲問思續先人

未竟之業惜未編輯成
書子在恩能守其家學

九日兔牀先生邀遊尖山

蠟屐欣茲杖履陪登臨到此意悠哉名山自擅東南勝好友

還偕庾鮑來謂陶西疇一色天光明海境半空帆影落雲堆

豪情直擬滕王閣肯把清樽對月開

羅模字鳴一平

石瀨山房詩話鳴一家貧苦志力學年五十三猶困童子試乾隆成夏學使彭芝亭先生簡拔入庠覆校日中暑暴卒學使者弔以文曰人生哀樂如鷗轉輪賀者在室弔者在門炎官火繖厥威何虐本自孤寒甯堪焦灼方將屬纊尙爾揮毫不如不售數或可逃五十年來寒齋苦學十二時中空花開落世上有人兩濟文福黃口科名白頭合僕獨汝偏窮一衿命畢何以解之莊生齊物一日之知浮屠三宿不待秋風文章已哭一時傳之誦

柳枝詞

烟柳條條盡作花隨風吹不到天涯天涯夫婿如相見難道

春歸不憶家

王璞 字希珍長興諸生著西齋詩存

鼓吹山 吳興掌故集陳文帝居鄉時縣令到仲舉開縣後鼓吹聲則帝必至故名

興王一代啟山靈鼓吹何疑說不經可惜歌聲殘玉樹平岡

長作寂寥青

章應奎 字聚五會稽人官江南同知

府志應奎幕遊江南以薦得官年老歸里越中風潮為災當事議築徐家堰海塘宋家漢石塘檄應奎董其役殫勞經理又倡設義塾以教子弟置義田以贍孤寡章故巨族貧乏者多賴之

遊絲

暖日青陽細欲浮非煙非霧弄綢繆搖空有影纖纖起著地
無聲宛宛收似趁宿醒隨畫轂慣牽幽夢度簾鉤可能繫住
韶華否過隙駒馳客正愁

羅繼章

號詡哉餘姚歲貢著
惜陰書屋詩草四卷

袁本泰序畧先生品端才俊積學
有年尤喜流覽山川寄情吟詠

西嶺草菴茶話

迢迢西嶺路落落小菴茶秋色在何處
銜盃問菊花
日照疎松淨風吹細竹斜孤煙霏未
了一雁落寒沙

王陽明先生講學處

祭川皆先河原委貴揚摧執中堯舜心
一貫孔曾學濂溪繩
其武象山溯其朔崛起有陽明後覺
侔先覺良知獲真詮眾
山仰喬嶽龍岡啓屯蒙兼江勤追琢
宵默探天根而不避謠
詠斯人惜云亾遺風嗟縣邈

倪家瑞

字龍生金華廩貢官開
化訓導著翼保齋詩稿

釋閱清從學詩賦示

自有眞衣鉢機鋒未足誇不須翻貝葉一任散天花入定心
能歛揮毫興自賒浪仙金可鑄尙恐愧方家

立夏後一日釋闕清過訪

春去人長懶君來意若寬坐非參玉版交亦擬金蘭鶴煮茶
初熟鶯嘯花欲殘小亭聊與坐深竹一盤桓

范崇治

字崧平西
安諸生

舟上章戴港

已入盈川境云歸未得歸舟遲灘陡轉風緊雨斜飛晚笛聞
漁舍青帘覆竹扉舊時垂釣處猶記鱖魚肥

徐日紀

字松圃桐廬廩貢官貴州
貴陽知府著松圃詩草

淇縣道上東張果亭司馬

夜雨瀟瀟晝卻晴暮春天氣送歸程花含細蕊香猶蘊麥漾

微波浪未成兩岸柳陰藏鳥語幾家茅屋隱雞鳴卷簾貪看
當前景不減江南道上行

張

鶴

字鶴年號芝田瑞安歲貢

病起東同社諸友

拋除塵累憩禪關飛鳥何心戀往還愁劇合謀千日醉病餘
贏得一身閒江村夜雨添新夢晴雪梅花憶故山多謝親知
相問訊舊時豪興已全刪

對雪

竹爐圍火爇新醅一逕寒香撲酒杯如此梅花如此雪惜無
人策蹇驢來

周駿發

字亦畊號亦庵錢塘人乾隆壬午舉人官江西南昌知縣著薈谿都村錦昌昌南望湖亭臥陶軒遂

初諸集

杭郡詩續輯亦庵六十後乞骸骨歸築小園于東城與
顧涑園光廬苑廬文韶余松巖昂霄松屏大觀何春渚

琪蔡臥雲曹仙梅斯棟黃相圃模
為九老會優游林下十餘年而卒

緝雅堂詩話亦庵自彭澤賦歸築室于良山門城堞間
取山谷贈晁无咎欲眠不遣客佳處更難忘句意作臥

陶軒與丁敬身布衣交密集中往還之作最夥其歲暮
懷人詩以布衣為首句云論詩存少作感舊溯城南分

詠東青萊尋禪滿月庵平生不可意對我常能談更有
難忘處名章祭二三嘗同詠菜花以東青門分韻又談

禪于滿月庵
故篇中及之

辛丑春祭恭謁應天山陸文安公祠

凌晨展祀事問渡遵周畦村舍列遠近菜花開高低春風亦

料峭與僕勞攀躋絕壁積鐵立巉巖前名題山中有李夢陽諸人題名面

陰寒起粟淙灑瑩無泥翠竹森掩映孤梅簇芳蹊荒祠企講

學正指披羣迷千載光儒術遐哉信國齊殘碑蔽豚柵後裔

感淪漸宰邑慚修闡薦芼追幽棲

讀韓仲止礪泉日記得絕句二十首

夜行侵曉未收韁，慙愧東西致政坊。退老江陵榮拜號，幽棲

亭畔鴈聯行。朱昂招弟協歸老江陵自號退叟建知止幽棲二亭太守陳堯叟署其所居曰東西致政坊

高閣峇崙道，佛名天香燒處步。虛聲殊榮又進林，靈素曾否

招魂五國城。林子中記禁中帝后每早輪一尼一道于道佛國贊念導上燒天香

篇籍由來備石渠，稗官小說總紛如。一朝讜論崇儒雅，真靖

何緣校道書。王欽臣奏差真靖大師陳景元校黃本道書范祖禹封還謂館閣之書下至稗官小說無所不

有若使景元校道書其餘釋書醫卜陰陽各委本色非祖宗設館之意遂罷之

頭白潘郎寫素綃，著名還假曲江濤。後來豪興追前輩，百韻

詩成亦咏潮。潘閔遊游浙江咏潮著名或寫以輕綃謂之潘閔詠潮圖按吾鄉桑戶部攷甫亦有咏浙江

潮七言百韻

澄潭何事號羅家，籍隸新登定不差。猶有沈崧銘墓在，錢塘

仙吏豔潘花

羅隱吳越備史作新登人蓋本新城後梁時吳越改新登白孔六帖云墓在撫州樂安縣羅家

潭誤史載開平三年遷發運使卒墓于定山金部郎中沈崧銘其墓

東南掌錄錄濤江亭問盈川著此邦何處尋蹤高四傑空餘

灘影日淙淙

李習之東南錄載癸己駕濤江逆波至富春丙

衢州今時不見盈川亭不知何所也

黃州詩重錢唐尹手植亭亭日放衙車馬門前尋舊蹟春風

開過海棠花

羅隱為錢塘令手植海棠花一本于庭前王黃州有詩稱之舊治在錢塘門裏三十步今車馬

門是也

龍泓龍井本仙源閩海移山論不根好事猶傳白少傅井華

烹茗出僧垣

日記引晏殊所云龍泓洞在福建汀州靈隱山下吳赤烏二年葛仙翁于此得道又云靈隱山

有白少傅烹茗井與咸淳臨安志及武林舊事所載互異攷

閩書汀州甯化縣有靈隱洞無靈隱山並無所謂龍泓龍井之名遞述元獻之言當屬傳訛耳

哦松廳解無多子隱僻英淤閣豈孤仙尉開軒渺何處安排

秋月擅平湖平湖軒在錢塘縣尉解英淤閣後閣名甚僻平湖秋月為西湖十景之一

清水何如利涉門櫺櫺桐木寄仙園自然得道留遺蹟化鶴

歸來梧影翻水府觀在利涉門外桐木園神仙馬自然得道于此今徙清水門

連宵春雨長青蕙策棹無由覓紙題七百里程行不得玉山

山下溯高溪李習之東南錄云自玉山至湖七百有一十里順流謂之高溪今不知有此名也

築沙舊里號青平萬派松濤到耳青傑閣千年紀盛事儒賢

亭會錫嘉名儒賢亭會之閣在萬松嶺東青平門乃故相劉正夫舊里號青平里政和三年敕建閣賜之

平生夢想巢居閣孤嶼人傳處士橋梅鶴至今零落盡只留

煙水付漁樵林逋舊居有巢居閣或云在寶林寺即雲巢也攷和靖集序云君復不仕結廬孤山所居有巢

居閣處士橋與此少異

防風氏古鄆臚國志載於潛居有那山畔誰探風渚跡又從

兩浙輶軒續錄

卷八

周駿發

三

十一

寰宇記金鷲金鷲山寰宇記云一古山名也風渚古鄭國也又杭州府志金鷲山在於潛

縣南一里
高八十八丈

築室溪干有竹莊亭支兼淨水為鄉干鍾座上澆書酒贏得

名流幾報章徐釐字應祺上饒人溪干築室名竹莊作兼淨亭在水竹間韓元吉以詩和之云直須座上干

鍾酒澆起胸
中萬卷書

吟詩何必寄希夷白日閒愁亦太癡堪笑頑童春睡熟曉樓

忘卻打鐘時潘閻寄陳希夷詩有清宵無好夢白石有閒愁世態既如此壯心應已休語近訕上真宗朝心

匿舒州潛山寺為行者題鐘樓詩云頑童趁煖貪春睡
忘卻登樓打曉鐘郡守孫僅見之日此必潘逍遙也

鬚髮搖風木偶如鍊情成性見端居從知靜裏工夫到千百

人中得寶初晁文元嘗瞑目端坐鬚髮搖風凝然若木偶有詩云鍊鑛成金得寶珍鍊情成性合天真相逢

此理交談者千
百人中無一人

世風燒薄厚誰敦折柳還期圃可樊千載瓣香公叔子閉門

著論尚崇原朱穆字公叔尊德樂道常感時澆薄慕尚敦篤作崇原論

荷花水木半僧寮拜號南池自遠翳此日信州重訪古春風

春雨小停橈王洋字元渤官中書舍人居信州城居前有荷花水木之趣因號王南池關晏室榜曰半僧寮

圍棋劇飲范元卿到處詼諧一座傾家近釣臺堪荷鍾蘭溪

溪畔擅香名范端臣字元卿談論滑稽圍棋飲酒滿座風生作起居郎葬于子陵釣臺家在蘭谿之香頭

邱永字星河號雲涇仁和人峻子乾隆壬午舉人官國子監學正著雲涇草堂遺稿

杭郡詩續輯雲涇寬中篤厚行不慚影學文于杭堇浦學詩于沈荻林師法克承才名籍甚嘗游大江左右又入閩修入閩通志丙戌禮闈報罷

命大臣選下第舉子有文望者充國子監六堂課士官于

午門外嚴試得卷十五名

欽定第一其後與修皇朝太學志發凡起例所纂擬居多嘗紀先德言行為邱宗信譜述前賢事蹟為雲涇雜錄其他詩文稿本甚富悉

煨于

登嘉瓜臺作

玉露淨朝暉寒桐實秋響擺履蹋殘莎就彼層臺廣客襟喜
空涼天宇更蕭爽高鳥集喬柯遙風遞巖幌林疎翠稜出山
瘦孤雲往中有黃犢廬蠟屐試一訪

三江應宿閣

蚪蟠千仞越江隈奇險真疑鬼斧開縮版巧當蒼嶺斷崩雲
時送活泉來不妨暮雨成膏澤無復秋鴻怨草萊二十八門
遙望處羨公天與巨川才

奉和杭堇浦先生建隆寺懷古

香臺高倚蜀岡前天水開基紀昔年九廟御容迷舊影三摩
花雨散諸天悲風鬼泣秋深豕斜日人耕戰後田回首英雄
千載隔難將陳跡弔荒煙

查茂蔭

字經根海甯人乾隆壬午舉
人官奉化教諭著樸硯詩藁

吳衛照曰先生少穎異年十二補博士弟子員解經擅長

奉化竹枝詞

茅亭如斗結巖旁慣趁奔泉碓秫秫疏杵聲中清唱徹竹槎

風送傍垂楊

奉邑春米俱用水碓并有編竹為舟者

登焦山文殊閣

三詔高人渺談禪孰可論雙峯天外落孤月浪中翻帆影疾于鳥漁歌清似猿登臨佳處久何日臥雲根

雪竇寺題壁

殿閣崔巍路百盤鐘聲遙閣冷雲端喜晴山鳥頻聞語因雨庭花半已殘峯偈後牆渾欲墮樹鄰古佛亦生寒廿年五過重題壁直為遨游作此官

陳

涵 字嶺塘海甯人乾隆壬午舉人官桐廬訓導著觴詠堂詩集

陝川續志預堂博極羣書文有經術詩詞皆精金百鍊
乾隆壬午出彭芝庭先生門深器重之性謙退不慕榮
利晚年歸里授徒僧房蕭然
物外書法韓柳兼善繪事

秋別

病容似尊酒酒面人面黃別人似蠹木木心人心傷聚合天
妒忌分別秋主張輪聲山峩峩帆影水湯湯身非輪與帆那
能隨君旁

天霜不可惹人情不可牽惹霜不留葉牽情不永年短燭走
長道況禁大風旋百歲供一瞬況禁萬感煎有分必有合天
道何所偏西風轉向東依舊草蔥芊

西村農家

小結茅庵曲結籬草亭東岸板橋西兩株枯柳夾溪臥無數
寒蟬抱葉嘶應候黃瓜誇並蒂先時紫蟹檢團臍晚來飽飯

呼兒女掘得水芹更作齋

袁

知字紆亭新城人乾隆壬午舉人官

杭郡詩續輯紆亭以教習棟發江南歷宰南匯武進宜
與銅山諸邑以勤幹著見知于仁和孫文靖公擢守雲
中兼權雁門觀察詩凡四卷晚年手自編輯道光二年
子鍾琳授梓其詩不事描摹獨來獨往自成一家借所
存無幾不盡
得意之筆也

施竹田丈招同泛湖訪恆上人分韻

破曉重湖一望收段家橋畔繫扁舟山寒無處不宜酒木落
有時還帶秋煙景到誰佳句裏好風吹我上方遊慈雲佛火
殊清絕始信花宮勝十洲

靜虛齋作

莫教愁思上眉尖酒闕詩場樂事兼四十休嗤宣髮早一生
慣惹熱人嫌愛花初放常尋句待燕歸來不下簾尺寸且安

吾分事冷官何處可趨炎

箬溪東嶽行宮登爽心亭

西風吹冷袂得得迤山麓天孫重所司呂侯勤所築岫嶼護
百神拂拭顛末讀瘦石挺霜毫千金購尺幅趙松雪書幽閣破晴

煙五峯抱萬木崖粵宮之西小亭結山腹直上林薄號萬戶

俯團簇落日洞庭孤飛雲展天日香蘭入檻明野雉環溪伏

蘭雉二山在縣北 俯仰爽心在空谷起問蒼松存懸崖風穆

穆上有古松二株相傳崇植閒竝葵

題許默齋連枝圖

仲弟有至行伯兄補采蘭同心生死別含淚畫圖看弟仲昭

親戚疾不起今二 聽雨花仍發驚風雁不單吾鄉添勝事孝

友一門難

三遊蘇門山

每到尋幽不憚煩兼來作別水香邨澄潭曲繞清暉閣綠竹
深藏白鹿園西望太行連碧漢北通井峪漾泉源明朝又向
京華去檢點詩囊細討論

出殺虎口竹枝詞八首

朔方古道繞邊牆撲面飛塵眉盡黃耶律德光知食肉夕陽
影裏下牛羊

草黑沙黃暮已昏崢嶸葵吠護柴門峯迴路轉迷無際敗屋
頽牆又一村

破曉肩輿莫或遑入秋滴露盡成霜冬蔥春韭無他味悶煞
酸寒同舍郎

澗溪石子費疏肥水草湯湯踏淺沙高下山梁無一樹偶逢

村店兩三家

汪洋岱海沒漁篙濁浪隨風沙自淘欲覓村沽無曲巷冲寒
顰蹙飲燒刀

蠻煙寒霧路干迴一片平原古堞摧草地離離黃萬頃包房

纍纍白干堆

草地蒙古人所居白氈圍裏作房所謂蒙古包也

壓帽崇岡夕照邊胡兒瞻就頌祁連明妃古冢青青草一曲

琵琶我亦憐

土炭生煤總怯涼野花蓬鬢儉梳妝坑頭不是尋常火馬渤

牛渡分外香

王鑿

字敬輿號復齋歸安人乾隆壬午賜舉人官河南陝汝道著鄂暉堂集四聲箋

南巡召試

略

吳錫麒撰墓誌復齋晚年豪於詩據懷詩百韻傳誦於時癸丑暮春會諸名士游歸雲庵成五言十九首畫歸

雲雅集圖

以誌其事

曹楙堅序略復齋先生詩溫純厚雅隨方合節遂初以後厥旨淵故

書張楊園先生備忘錄後

日誦名言任喚迂殘膏沾句及吾儒積年纔去一矜字當代

曾敦幾薄夫檢點昨非真氣餒思量戰勝覺形臞敢忘鹿洞

逢嘉會二老殷勤指畫圖
鈕西齋師主愛山講席學使雷翠庭先生按湖州至院同舍凌亢宗

發以楊園先生像進二公歎賞咨嗟講論彌晷

題費可園侍御 孝昌 秋山遠眺圖

陝洛重相見萍蹤又判年塵容真老矣初服固安然綠野同

攜榼清茗好放船臥游隨處足不費買山錢

潘本素 字履初號平子隴安人乾

秋日借同人泛舟潞河城北

出郭遺塵事招尋
愜勝游野橋低貼水
堤樹迴舍秋水落紅
蕖晚天空翠嶽浮
故園回首憶蘋蓼
滿汀洲

颯颯涼颺動遲遲
細浪生疎萍翻鳥影
高柳曳蟬聲爽節猶
宜葛平陂可種秔
塵鷲都不到休更事
浮名

迴舟沿葦岸塔影墮
微茫遠道生愁思
高城易夕陽流連魚
鳥興澹宕水雲鄉
種豆他年約相過
意莫忘

雨泊胥江

溼雲淙淙霏江城
燈火遙林缺處明
夜雨暗催梅柳色
春寒低壓管絃聲
座逢勝友新投分
臥聽鄉音錯問名
明發不知何處泊
珠簾繡柱最關情

盧

瀚

字紫瀾 鄞人 乾隆壬午舉人 官於潛 致諭

秋夜

涼吹徧高樹颯然秋意寒徒憐桂子落相對菊花殘濁酒試
孤酌素琴誰與彈仰天一搔首愁思正漫漫

贈覺空山人

參得真如偈蒼然已老顏點頭有頑石饒舌是寒山曾向西
湖住新從南海還更尋駐錫處千頃白雲閒

周紹洙

字樂澄山陰人仁和籍乾隆壬午舉人官會稽教諭

題陳老蓮畫

閒雲住不飛涼月澹于水中有幽棲人沿山拾松子

韓

義

字理齋會稽人乾隆壬午舉人官廣東潮州知府

題姚宇清

繼祖

品泉圖

古人品茶先品泉銅瓶新汲活火煎靈源要從地中出揚子

江心推第一豈知山澗多清冷懸巖瀑布飛雷霆玉龍天矯

噴晴雪珠箔迤邐垂翠屏我家會稽山峻絕乳竇懸泉最清
冽天柱峯頭日鑄茶頭綱更與龍團別憶昔偕君年少時捫
蘿涉澗蹇瑤芝寒流淙淙漱鳴玉春旗乍展吟新詞一自馳
驅各出宰拋卻林泉浮宦海眯眼黃塵衣化緇茶煙輕颺鬢
絲改君今治行卓異徵漢廷循吏褒賢能令子聯翩掇科第
雷雨變化成鯤鵬官閣蕭閒訟庭靜曲奏瑤琴花對影呼童
澹茗試天漿萬卷縹緲春晝永嗟我奔走成勞薪臨河欲渡
方迷津何幸逢君濠梁道學祛一笑論前因飲我故鄉酒示
我故鄉圖松風鶴夢意瀟灑蟹眼魚珠知有無賀監湖頭結
湖目蘭亭脩竹干竿綠披圖我亦憶幽棲三徑就荒賸松菊
何時解組歸敝廬與君共向圖中居陶然七椀風生腋石上
聯吟興不孤

任

炎

字司皞號西亭蕭山人乾隆壬午舉人

海嶼詩話西亭詩多真樸唯咏物則不脫不黏掃盡瞿宗吉謝宗可習氣

秋海棠

勻來顏色點秋霜彷彿殘霞簇錦塘暮雨尚淒紅燭影綠陰空貯翠雲箱可憐永巷悲陳后無復高唐夢楚王一種風流顛顛甚豈宜重問碧雞坊

秋草

年華風景尚依依臨水登山賦日歸蘭蕙春風前度遠蒹葭秋水昔人稀殘螢光散明珠串寒蝶香銷舊粉衣太息里居張仲蔚蓬蒿長映竹簾微

夏復森

字培叔嘉興人

觀象臺題壁

草色荒蕪過雨遲短牆古柏暮雲垂桃花紅引遊人去獨自

斜陽讀斷碑

衛

琨

號杏齋長興諸生箸
湖閣詩集旅吟艸

石壁峰懷友

一泓水湧石芙蓉倒影峰巒入鏡中想得高人在空谷蒼顏

危坐聽松風

來文濬

字休齋蕭山人官
山西定襄典史

春過宜章折嶺

盤旋峻嶺路何奢活活溪流溪峭石斜蝶使紛飛催杏蕊蜂媒

亂舞落梅花石巖虎踞傳仙迓茅屋蟬聯認酒家忽聽隔林

吟白雪恍疑李愿嘯明霞

夏之時

字聖得
金華人

金華詩錄聖得苦志力學
不恤勞瘁以此得疾而天

游絲

春晝園林靜游絲正嫋然傍枝依柳細帶蘂入花偏一縷穿
雲起移時映日懸忽當風過處縹緲上遙天

余國鼎

字元羹號梅川瑞安歲貢著西峯山人詩鈔

洪守一序略梅川先生擁皋比五十年談經之暇耽於吟詠大致以和平取勝年最高詩亦最富全帙幾近千首

月夜見雁

天末微鷗動冰輪一鏡開乍聞征雁至遙帶斷雲來露冷銀
河迴風高玉笛哀乾坤秋氣肅為爾上層臺

登西山次韻

石磴攀蘿一徑穿蒼茫雲水遠天連江河景色留殘照日月

浮沈感逝川閒散獨憐沙際鳥嘯歌誰是飲中仙同人欲盡
憑高興漠漠平林起暮烟

秋興八首用何大復先生韻

錄四

昔年亦負飛騰意涉厯山川望

闕廷紅葉孤帆明月浦酒旗山郭夕陽亭千秋遺迹歸憑弔
八月洪濤入晦冥回首壯遊空往事繁霜愁點鬢邊星

秋光浩蕩向空來山閣平臨睥睨開接地風雲迷北望大江
潮汐自東迴閒居漫作潘郎賦獻策空慚季子才峴首峯高
時縱目暮天征雁不勝哀

秋山寂寂罕經過茆屋家家長薜蘿流水聲中消往事夕陽
影外見漁蓑避人阮籍逢迎少入世王尼感慨多薄暮西風
江上急平沙浩渺起烟波

叢桂幽巖送晚芳
疎林紅葉冷彫霜
魚龍秋老眠滄海
鴻雁天高下夕陽
千里知交勞入夢
十年朋舊幾登堂
空山向晚松風起
獨倚匡牀覺夜長

擬古

西山下白日千里起
層陰美人處
遐方川路阻且深
浮雲東南翔
棲鳥鳴北林
旅羈無與晤
惆悵勞寸心
秋至雁南飛
哀鳴矯其翮
關河千里征
有似遠行客
朝逐浮雲遊
暮息滄州跡
寒郊稻梁空
戚戚將安適

瑞平寺後山步月

夕陽水際殘
東臯月流素
開軒攬清景
穿林散幽步
入聽風泉聲
遙帶疎鐘度
渺渺見遠邨
霏霏開烟霧
觸物欣有得
賞心隨所遇
行行澹忘歸
此中有佳趣

同人橋畔坐月

清光忽在水仰視山吐月林塘湛空明襟懷坐超越同人愜
幽賞微吟清興發夜靜聞澗聲霜餘見山骨冉冉溪雲生隱
隱前峯沒歸來掩關臥商音在林樾

吳廷樂

字檢堂山陰諸生
著芳草園詩藁

陶潛宣日君承其父水雲先生家學幼即能詩兼工繪
事先生客保陽方敏恪公幕最久君歲一走省嘗乘海
船渡嶺南泊黑水洋對月長嘯有逍遙汗漫之想一日
過七州甲子洋大風折颿船幾覆君酌酒哦詩自勞歸
述所遇作長篇一百六十四韻浙東西豪於詩者皆嘆
惜歎為不及客粵既久登白雲尋蒲澗探星岩歷羅浮
游屐所經詩卷益富所存大半行役之
作閒或拙于脩辭而意態自傑適可喜

潛江峽口夜泊有懷

江上風威動孤舟一葉微寺鐘清不斷山鳥夜還飛坐久因
看月寒深每換衣何曾迷去路不必悟前非

夏日過蒲澗寺

攬勝時登選佛場，碧蕉翠竹送新涼。
山僧不管人來往，自拗松枝補壞牆。

白雲巖

傳爲安期
生昇天處

蒼岵蒸山氣，峯巒豁洞天。
名區眞可卽，仙蹟浪流傳。
鶴舞風前樹，龍吟雨後泉。
何當結茆屋，坐臥白雲邊。

憩玉山白雲古剎路亭

松嶺鬱蔥青，風濤憩客聽。
翠飛苔上雀，涼愛水邊亭。
花雨侵禪席，雲山列畫屏。
年年山下路，知有幾人經。

謁韓文公祠用家大司馬留邨先生韻

忠誠垂日月，遺廟肅江隈。
水靜蛟龍遠，風清鸞鷲來。
文章千古重，煙瘴百蠻開。
初送瞻韓願，從誰闢草萊。

憶初鶯閣

曾記春園雪後行
梅花世界夢分明
醒來小閣月初墮
聽足流鶯百轉聲

暮春和高瓚侯韻

花界流觀轉睫空
五更嘯破杜鵑風
平蕪細草迎新綠
小圃繁葩落舊紅
南部雨聲殘夢後
東皋爽氣晚涼中
故園燕麥年年長
沂浴雲風興不同

濂泉探梅

六真橋慣鎖煙霞
蘚碧苔青磴道斜
歸路不知春已晚
滿天晴雪落梅花

自羚羊峽至玉皇峯口占

上界蒼茫獨立時
問天不語自相思
飛泉迸石分還合
行客

穿雲過始知歸樹鳥從平地上懸崖花向半空垂遊仙曾記

三生約長揖浮邱訂後期

周道潛

字汝昭會稽人著蘭陵草

陶潛宣曰君常客蘭陵與許櫟園施陶山沈雲嶠成蘭陵唱和集喜和韻常疊至數十次妙義環生新穎可喜尤善於賦物別箸稅紛集一卷

秋雁

嘹唳有餘哀驚聞心欲摧如何千里外不寄一書回月自樓

前過寒從夜半來江湖君莫厭菰米坼蒼苔

宋鳴軻

字肇城蕭山諸生著逸亭詩草七卷

吳錫麒序畧宋君逸亭越人也而好越吟嘗仿其鄉前輩金南亭無雙譜例輯越人之尤異者為古今樂府四十首又嘗登高覽勝憑弔古今為越吟一卷時或二三親故酌醴澆鮮更唱迭和未嘗不自放胷臆而纏懸排側能本素所蓄積者以出之荀子云越人安越若君者雖操其土音而取材則宏遠矣

陶濬宣曰君年十八夢遊學宮見宮牆朱書鳴軻二字
 遂以命名是年入學買鍾氏園卜築數椽養魚種菊結
 社賦詩為樂自言坐臥一小樓每讀書至夜分開窗四
 望江聲月色清氣襲人憑闌久之然後就睡可以想其
 襟次矣所詠多越中故
 事攷逸闌幽足裨志乘

廬舍落成

營得買山錢蕪穢自翦闢雖未遠市廛頗已就閒適自維蒲
 柳姿不堪膺繁劇願言息勞筋桑榆景自惜有時天氣和偶
 著尋山屐石上坐揮毫掃卻莓苔迹本自不求工何必論詩
 格

自落塵網中性靈日以汨憂來筆硯焚壯懷空鬱勃故人為
 我言及早營巢窟小園一畝餘結構傍林樾白雲時往還閒
 鷗互出沒奇文吾自欣疑義吾自闕安得素心人促膝談風
 月

讀先曾祖詩集

遊自秦淮久交從燕趙來風霜清客思湖海老詩才行樂東
山屐論心北海杯獨慚抱甕者祇自守蒿萊

坐雨

北望雲垂地西來風滿天江空鳴急雨山峻落飛泉護冷添
衣坐防愁借酒眠起看蘆荻岸閒泊釣魚船

邨居

雲山環繞薜蘿深未許塵凡半點侵嘯鳥翻添三徑靜疏林
併作一庭陰偶栽陶令籬邊菊不作靈均澤畔吟歲月自移
風景在不知人世有升沈

六十初度詠懷

阮裕從來少宦情青袍莫道誤儒生自知骨相貧非病未許

文章老更成叩戶乍停賢士駕趨庭正奉小人羹劬勞母氏
知難報且著萊衣獻兕觥

莊舄閒來愛越吟雙孫學語已成音恰看令節催人老未識
何時見汝心已訂詩篇誰定論未安宅兆待重尋叮嚀手澤
無他物一覩留遺望最深

吼山

造物故好奇鑿空山骨立不見天四圍日月生絕壁孤舟入
山來洞口小於巒呶軋騰聲肥石罅噌吰激蒼翠射衣裾目
眩不暇給呼樵未及答谷應聲轉急綠陰生微涼寒藻澆深
碧池魚施食來鳴鳥如舊識物情各自忻俯仰頗有得願隨
隱君子日夕耽游息

方干巖

湖山八百望中收一片閒情付白鷗臥聽波濤翻石壁醉攜
琴鶴上漁舟缺脣有憾生難補燒尾無緣死忽酬聞有知音
不延薦潛夫豈是傲王侯

何震

字天寵號蓮塘上虞諸生箸蒼賞館詩存

隱仙庵古梅

羅浮古仙人爛醉蒼苔臥滿身結冰花鶴警因風破天女驅
白雲珠璣隨咳唾

鄭溥

字駕韓號涉園上虞武生箸浣江質言

偕天台陳君游天竺晚歸

聯轡登三竺分鑣溯兩隄梵音秋響雜霜樹晚霞迷湖艇驚
鷗夢山橋送馬嘯巴人歌未闕鐘韻動招提

兩浙輶軒續錄卷八